

# 佛說戒德香經

東晉天竺三藏竺曇無蘭譯



南無本師釋迦牟尼佛

## 說明

本繁體校正版《佛說戒德香經》電子書，是根據清制《乾隆大藏經》小乘阿含部，第 0584 部，東晉天竺三藏竺曇無蘭譯《佛說戒德香經》原藏本雕板印刷影印本校正的。標點符號僅作參考。特此說明。

仁慧草堂

二〇一七年十月

# 佛說戒德香經

東晉天竺三藏竺曇無蘭譯

聞如是：一時，佛遊舍衛國·祇樹·給孤獨園。

時，賢者阿難閑居獨思：“世有三香，一曰根香，二曰枝香，三曰華香。是三品香，唯隨風香，不能逆風。寧有雅香，隨風、逆風者乎？”

賢者阿難獨處思惟此義所歸，不知所趣，即從坐起，往詣佛所，稽首足下，叉手前白佛言：

“我獨處思惟，世有三香，一曰根香，二曰枝香，三曰華香。此三品香，唯能隨風，不能逆風。寧有雅香，隨風、逆風者乎？”

佛告阿難：“善哉！善哉！誠如汝問，有香真正隨風、逆風。”

阿難白佛：“願聞其意。”

佛言：“若於郡國、縣邑、村落，有善男子、善女人，修行十善，身不殺、盜、婬，口不妄言、兩舌、惡口、綺語，意不嫉、恚、癡；孝順父母，奉事三寶，仁慈道德，威儀禮節。東方無數沙門梵志歌頌其德，南西北方四維上下沙門梵志咸歌其德。某郡國土、縣邑、村落，有善男子、善女人，及奉行善，敬事三寶，孝順仁慈，道德恩義，

不失禮節。是香名曰隨風、逆風，靡不周照，十方宣德，一切蒙賴”。

佛時頌曰：

雖有美香華	不能逆風熏
不息名栴檀	衆雨一切香
志性能和雅	爾乃逆風香
正士名丈夫	普熏于十方
木密及栴檀	青蓮諸雨香
一切此衆香	戒香最無上
是等清淨戒	所行無放逸
不知魔徑路	不見所歸趣
此道至永安	此道最無上
所獲斷穢源	降伏絕魔網
用上佛道堂	昇無窮之慧
以此宣維義	除去一切弊

佛告阿難：“是香所布，無礙須彌、山川、天地，不礙四種地、水、火、風，通達八極，上下亦然。無窮之界，咸歌其德。一身不殺、盜、婬，世世長壽，其命無限；不盜竊者，世世富饒，又不忘遺，財寶常存，施爲道根；不淫泆者，不犯他妻，所在化生蓮花之中；不妄言者，口氣香好，言可信之；不兩舌者，家常和合，無別離業；



南无护法韦驮尊天菩萨

